

**ԹՈՒՐՔ-ՎՐԱՑԱԿԱՆ
ՀԱՐԱԲԵՐՈՒԹՅՈՒՆՆԵՐԸ ԹՈՒՐՔԻԱՅԻ
ՏԱՐԱԾԱՇՐՁԱՆԱՅԻՆ ՔԱՂԱՔԱԿԱՆՈՒԹՅԱՆ
ՀԱՄԱՏԵՔՍՏՈՒՄ 1991-2001ԹԹ.**

*Գրիգոր Արշակյան՝ Արման Եղիազարյան**

***Թուրք-վրացական հարաբերությունները 1991-1994թթ.
և վրաց-աբխազական հակամարտությունը***

ԽՍՀՄ փլուզումը և Անդրկովկասում ինքնիշխան պետությունների ի հայտ գալը Թուրքիայի արտաքին քաղաքականության մեջ նոր ուղղության անհրաժեշտություն առաջացրին: Անդրկովկասը ռազմավարական կարևորություն էր ներկայացնում Թուրքիայի համար, ուստի վերջինս սկսեց ակտիվ քայլեր ձեռնարկել Անդրկովկաս ներթափանցելու համար: Այդ ուղղությամբ նրա առաջին քայլերից մեկը եղավ Ադրբեջանի և Վրաստանի հետ սերտ հարաբերություններ հաստատելու քաղաքականության որդեգրումը:

Անդրկովկասյան տարածաշրջանում Թուրքիայի շահերը պայմանավորված էին արտահանման համար նոր շուկաներ ձեռք բերելու ցանկությամբ, ինչպես նաև տարեցտարի աճող վառելիքի պահանջարկը բավարարելու ձգտմամբ, որը պետք է լուծվեր ի հաշիվ կասպիական և միջինասիական տարածաշրջանի նավթի և գազի պաշարների:

*Պատմական գիտությունների թեկնածու, ՀՀ սփյուռքի նախարարության հայրենադարձության և հետազոտությունների վարչության հետազոտությունների բաժնի պետ:

**Պատմական գիտությունների դոկտոր, ՀՀ սփյուռքի նախարարության հայրենադարձության և հետազոտությունների վարչության պետ:

Մյուս կողմից՝ Թուրքիան խիստ հետաքրքրված էր, որ վերոհիշյալ տարածաշրջանների էներգետիկ ռեսուրսները Եվրոպա տեղափոխող երթուղիներն անցնեն սեփական տարածքով, ինչի հետևանքով բարձրանալու էր Թուրքիայի աշխարհաքաղաքական նշանակությունը՝ որպես կամուրջ եվրոպական և ասիական տարածաշրջանների միջև [1, էջ 34-49; 2, էջ 35-54]: Քանի որ ճանապարհը դեպի Կասպից ծով և Կենտրոնական Ասիա ընկած է Անդրկովկասով, Թուրքիան, ինքնըստինքյան, պետք է շահագրգռված լիներ այդ տարածաշրջանի կայունությամբ և այդ պատճառով Ադրբեջանի և Վրաստանի անկախությունն ու տարածքային ամբողջականությունը հոչակեց որպես իր ռազմավարական առաջնահերթություններ [3, p. 151; 4, p. 45; 5, p. 63]:

Անդրկովկասում 1990-ականների սկզբին սեփական դիրքերն ամրապնդելու քաղաքականությունն իրականացնելիս Թուրքիան հատկապես կարևորում էր Վրաստանի աշխարհագրական դիրքը, որը վերոհիշյալ էներգետիկ ռեսուրսների տեղափոխման ճանապարհին միակ կամուրջն էր, քանի որ մյուս հավանական կամուրջը՝ Հայաստանի Հանրապետության տարածքը, հասկանալի պատճառներով դուրս էր դրվում թուրքական արտաքին քաղաքականության հաշվարկներից: Հետևաբար, Թուրքիան ի սկզբանե առանձնահատուկ հետաքրքրությամբ սկսեց հետևել Վրաստանում ընթացող գործընթացներին և, հատկապես, վրաց-աբխազական հակամարտությանը:

Վրաստանի անկախությունը Թուրքիան ճանաչեց 1991թ. նոյեմբերի 1-ին, սակայն նրա հետ դիվանագիտական հարաբերություններ հաստատեց միայն 1992թ. մայիսին՝ ԱՄՆ-ի կողմից Վրաստանի անկախության ճանաչումից, Վրաստանի առաջին նախագահ Զ. Գամսախուրդիայի վարչակազմի տապալումից և Էդ. Շևարդնաձեի Վրաստան վերադառնալուց հետո: Խնդիրն այն է, որ մինչ այդ Վրաստանում ընթանում էր քաղաքացիական պատերազմ և միայն հեղաշրջումից հետո, երբ 1992թ. մարտին Վրաստանում ստեղծվեց Պետական

խորհուրդ ու վերջինիս ղեկավարման համար հրավիրվեց Էդ.Շևարդնաձեն, երկրում կայունություն հաստատվեց [6, p. 287; 7, p. 257]:

Տեսնելով, որ Վրաստանում աստիճանաբար կայունություն է հաստատվում, Թուրքիան անցավ իր ծրագրերի իրականացմանն ուղղված կոնկրետ քայլերի:

1992թ. վերջին Թուրքիայի վարչապետ Ս.Դեմիրելը պաշտոնական այցով ժամանեց Վրաստան: Այցի ընթացքում նա և Էդ.Շևարդնաձեն ստորագրեցին բարեկամության և համագործակցության պայմանագիր¹: 1992թ. դեկտեմբերին Թուրքիան Վրաստանին տրամադրեց \$50 մլն-ի վարկ՝ ցորեն և այլ ապրանքներ ձեռք բերելու համար: Թուրքիան նպատակ ուներ այդ ճանապարհով խթանել նաև թուրքական մասնավոր ներդրումները Վրաստանում [8, p. 225]:

Պետք է նշել, որ հարաբերությունների սերտացումը համապատասխանում էր թե՛ Թուրքիայի և թե՛ Վրաստանի շահերին: Վրաստանը Թուրքիան համարում էր կարևոր դաշնակից տարածաշրջանում և նրա օգնությամբ ցանկանում էր ապահովել առևտրի նոր շուկա և ներդրումների աղբյուր, որը հնարավոր կլիներ հակադրել Ռուսաստանի ազդեցությանը Վրաստանի տնտեսության վրա: Բացի այդ, Վրաստանը ցանկանում էր ոչ միայն թուլացնել Ռուսաստանի դիրքերը՝ անդրկովկասյան տարածաշրջանային զարգացումներին Թուրքիայի ակտիվ ներգրավմանը նպաստելով, այլև Թուրքիայի հետ հարաբերությունները սերտացնելով՝ զարգացնել կապերը ՆԱՏՕ-ի հետ: Վրաստանը գտնում էր, որ Թուրքիայի՝ որպես ՆԱՏՕ կարևորագույն անդամ պետություններից մեկի հետ հարաբերությունների ամրապնդումն էական ազդեցություն կունենա Վրաստանի և ՆԱՏՕ-ի միջև հարաբերությունների զարգացման վրա [9, p. 25]: Վերջին երկու իրողությունները հաշվի առնելով է, որ Վրաստանի նախագահ

¹ *Manos Karagiannis*, The Turkish-Georgian Relationship and the Transportation of Azerbaijani Oil, <http://ourworld.compuserve.com/HOME/PAGES/USAZERB/413.htm>.

Էդ.Շևարդնաձեն 1992թ. մարտին Անկարա կատարած այցից հետո հայտարարեց, որ «վրաց-թուրքական հարաբերությունները մոտ են ռազմավարական լինելուն» [10, շ. 58]:

Թեև Թուրքիան կարևորում էր Վրաստանի աշխարհագրական դիրքը սեփական տարածաշրջանային ծրագրերում, թուրք-վրացական հարաբերություններում սկզբնական շրջանում լարվածություն կար: Թուրքիան Վրաստանի հետ կապերի սերտացման հարցում այնքան էլ չէր շտապում՝ սպասելով Վրաստանում 1992թ. բախումների հանգուցալուծմանը: Բացի այդ, վրաց-աբխազական հակամարտությունը, որը սկսվել էր 1992թ. օգոստոսի 14-ին վրացական զորքերի Աբխազիա ներխուժմամբ, Թուրքիայի արտաքին քաղաքականության առջև դրել էր կարևոր երկրնտրանք [11, էջ 15]: Կարևորելով Վրաստանը՝ Թուրքիան, սակայն, չէր կարող հաշվի չառնել նաև այն իրողությունը, որ վրաց-աբխազական պատերազմի ժամանակ Թուրքիայում զգալիորեն ակտիվացել էին աբխազական և չերքեզական համայնքները՝ ձգտելով օգնություն ցուցաբերել Աբխազիային:

1990-ականների սկզբներին, համաձայն որոշ տվյալների, Թուրքիայում աբխազների թիվը շուրջ 500-700 հազար էր, իսկ մնացյալ հյուսիսկովկասյան ժողովուրդների (ընդհանուր ներքին ընկալմամբ՝ չերքեզներ) հետ միասին՝ շուրջ 2 մլն [12, շ. 12]:

1992թ. Թուրքիայում գործող կովկասյան էթնիկ փոքրամասնությունների Կովկասյան մշակութային միության նախաձեռնությամբ 20 այլ կազմակերպությունների հետ ստեղծվեց ընդհանուր մարմին՝ Կովկասյան միությունը, որը շուտով ընդլայնվեց և ստեղծեց 23 մասնաճյուղ [13, քք. 4-5]:

Աբխազամետ նման միության գործունեությունը որոշակի դժվարություններ էր հարուցելու թուրքական արտաքին քաղաքականության համար: Այն վրաց-աբխազական հակամարտության ընթացքում ակտիվ լոբբիստական գործունեություն էր ծավալում ոչ միայն

Թուրքիայի քաղաքական շրջանակներում, այլև հասարակության մեջ: Այդպիսի մեկ այլ կազմակերպություն՝ 1992թ. օգոստոսին հիմնադրված Կովկասա-արխազական համերաշխության կոմիտեն հաջող լոբբիստական գործունեության շնորհիվ ստացավ թուրքական տարբեր կուսակցությունների աջակցությունը: 1992թ. հոկտեմբերին Թուրքիայի Ազգային մեծ ժողովում թե՛ քննարկումներ սկսվեցին մի կողմից՝ արխազներին, մյուս կողմից՝ վրացական իշխանություններին աջակցելու կողմնակից պատգամավորների միջև, որոնք ավարտվեցին փոխզիջումային որոշմամբ, ըստ որի՝ Թուրքիան արխազներին և վրացիներին հումանիտար օգնություն էր ցուցաբերելու հավասարապես: Փաստորեն, արխազական և դաշնակից համայնքները թուրքական խորհրդարանում կարողացան լոբբիստական գործունեության ճանապարհով ազդել Անդրկովկասում թուրքական քաղաքականության վրա [14, p. 33]:

Թուրք-վրացական հարաբերությունները 1990-ական թթ. սկզբին աստիճանաբար լարվում էին, քանի որ Թուրքիայի իշխանությունները չէին խոչընդոտում Կովկասա-արխազական համերաշխության կոմիտեին՝ աջակցելու արխազներին, որը հարուցում էր Վրաստանի իշխանությունների դժգոհությունը [15, c. 146]: Դրան գումարվեց նաև այն, որ 1992-1993թթ. Աբխազիայի նախագահ Վլ.Արձինբան մի քանի անգամ այցելեց Թուրքիա: Նա թեև Թուրքիայի պաշտոնատար անձանց կողմից ընդունելություն չստացավ, սակայն նման այցերը և արխազական լոբբիի ջանքերը բերեցին նրան, որ թուրքական հասարակական կարծիքն աջակցեց Աբխազիային [16, p. 195]:

Վրաց-արխազական պատերազմի սկսվելուն պես Թուրքիայի արխազները և չերքեզներն ակտիվորեն ներգրավվեցին հակամարտության մեջ: Վրացական զորքերի Աբխազիա ներխուժումից 2 օր անց՝ 1992թ. օգոստոսի 16-ին, Կովկասյան միության նախաձեռնությամբ Ստամբուլում և Անկարայում կազմակերպվեցին բողոքի ցույ-

ցեր ընդդեմ վրացական գորքերի Աբխազիա ներխուժման և Թուրքիայի կառավարության պասիվ դիրքորոշման:

1992թ. օգոստոսի 22-ին Թուրքիայի հյուսիսկովկասյան էթնիկ փոքրամասնությունների կազմակերպությունները հանդես եկան համատեղ հայտարարությամբ՝ դատապարտելով Վրաստանի ներխուժումն Աբխազիա: Նրանց նախաձեռնությամբ ոչ միայն հարյուրավոր կամավորներ մեկնեցին Աբխազիա՝ մասնակցելու պատերազմին, այլ նաև մեծ չափերի դրամական և պարենային օգնություն ցուցաբերեցին Աբխազիային¹:

1993թ. դեկտեմբերի 1-ին Ժնևում ՄԱԿ հովանու ներքո և ՌԴ միջնորդությամբ Վրաստանի և Աբխազիայի իշխանությունները ստորագրեցին Փոխըմբռնման հուշագիրը, որով նախատեսվում էր բանակցությունների վարման շրջանում կրակի դադարեցում և պատանդների փոխանակում [17, p. 251]:

Իսկ 1994թ. ապրիլի 4-ին Մոսկվայում ստորագրվեց 2 կարևոր փաստաթուղթ՝ Փախստականների և տեղահանված անձանց կամավոր վերադարձի և Քաղաքական միջոցներով վրաց-աբխազական հակամարտության կարգավորման մասին²:

Չխոչընդոտելով իր տարածքում բնակվող աբխազներին և հյուսիսկովկասցիներին աջակցություն ցուցաբերել Աբխազիային՝ Թուրքիան պաշտոնապես միշտ էլ հանդես է եկել Վրաստանի տարածքային ամբողջականության օգտին: Վրաց-աբխազական պատերազմի սկսվելուց հետո Թուրքիայի արտաքին գործերի նախարար Ն.Չեթինը հայտարարել է, որ դա Վրաստանի ներքին գործն է: Իր հերթին, Թուրքիայի փոխվարչապետ Է.Ինոնյուն դատապարտել է Հարավային Օսիային և Աբխազիային Վրաստանում տեղի ունեցած ընտրություն-

¹ *Egbert Wesselink*, *The North Caucasian Diaspora In Turkey*, <http://www.kapba.de/CaucasianDiaspora.html>.

² *Зверев А.*, Спорные границы на Кавказе. Этнические конфликты на Кавказе, 1988-1994г., Глава 1, VUB University Press, 1996, №.18; *Alexander Krylov*, *The Georgian-Abkhazian conflict*, <http://www.kapba.de/TheGeorgian-AbkhazianConflict.html>.

ներին չմասնակցելու համար: Ավելին, 1992թ. հոկտեմբերի 13-ին Թուրքիայի Ազգային մեծ ժողովը հանդես եկավ Վրաստանի տարածքային ամբողջականությունն ընդունող հայտարարությամբ [18, s. 12]:

1993թ. վերջերից Վրաստանի նկատմամբ Թուրքիայի ուշադրությունն ավելի մեծացավ՝ պայմանավորված Անդրկովկասում գերակա դիրքը վերահաստատելու Ռուսաստանի ակտիվությամբ, Վրաստանի շուրջ ծավալվող նման զարգացումների վերաբերյալ Թուրքիայի լուրջ մտահոգությամբ և աղբբեջանական էներգետիկ ռեսուրսներն իր տարածք Վրաստանի տարածքով տեղափոխելու ձգտմամբ [19, էջ 41]: Ուստի, Թուրքիան սկսեց քայլեր ձեռնարկել թուրք-վրացական հարաբերությունները բարելավելու համար, որոնցում զգալի սառնություն էր առաջացել Թուրքիայում տեղի ուեցած վերոհիշյալ խմորումների հետևանքով:

1994թ. հունվարին Վրաստանի նախագահ Էդ.Շևարդնաձեն պաշտոնական այցով ժամանեց Թուրքիա: Այցի ընթացքում նա և Թուրքիայի նախագահ Ս.Դեմիրելն Անկարայում ստորագրեցին հռչակագիր, որտեղ կողմերը հաստատում էին իրենց պարտավորությունը՝ «աջակցելու անկախությանը, խաղաղությանը, կայունությանը և ժողովրդավարությանը»: Երկու ղեկավարները հայտարարեցին, որ իրենց համագործակցությունն ուղված է լինելու անդրկովկասյան տարածաշրջանի կայունացմանը: Բացի այդ, ստորագրվեցին առևտրական և տնտեսական մի շարք համաձայնագրեր¹:

Կարելի է արձանագրել, որ, չնայած Թուրքիայի ազգային փոքրամասնությունների մի մասի՝ հոգուտ Աբխազիայի իրականացվող քարոզչությանը, Թուրքիան պաշտոնապես ճանաչեց Վրաստանի տարածքային ամբողջականությունը, որը թելադրված էր ինչպես աղբբեջանական էներգետիկ ռեսուրսներն իր տարածք տեղափոխելը Վրաս-

¹ *Manos Karagiannis*, The Turkish-Georgian Relationship and the Transportation of Azerbaijani Oil, <http://ourworld.compuserve.com/HOME/PAGES/USAZERB/413.htm>.

տանի վրայով իրականացնելու ցանկությամբ, այնպես էլ Ռուսաստանի առաջխաղացմանն ինչ-որ բան հակադրելու անհրաժեշտությամբ:

Վրաստանի համար կենսական դաշնակցի դերը ստանձնելուց հետո Թուրքիայում սկսեցին գերագնահատել իրենց կարևորությունը Վրաստանի համար: Թուրք հետազոտողները նույնիսկ սկսեցին հիմնավորել, որ Վրաստանն իր անկախության համար իրականում պարտական է Թուրքիային, քանի որ հենց իրենց հարևան լինելու հանգամանքը թույլ տվեց Վրաստանին նախկինում գոյություն ունեցող առևտրային համակարգի փլուզման հետևանքները հաղթահարել նոր տնտեսական կապեր հաստատելով: Ըստ նրանց՝ 1988թ. թուրք-վրացական սահմանային Սարպի-Բաթում անցակետի բացումը հսկայական ազդեցություն ունեցավ Վրաստանի արտաքին տնտեսական կապերի վրա: Տեղի ունեցող հակամարտությունների պայմաններում Թուրքիայի հետ այդ և մյուս սահմանակետերը Վրաստանի համար դարձան պատուհան դեպի արտաքին աշխարհ [20, c. 58]:

Թեև այդ ամենն իրականությանը որոշ չափով համապատասխանում էր, սակայն դրա դիմաց Թուրքիան, ձգտելով սերտ հարաբերություններ հաստատել Ադրբեջանի հետ, վերջինիս հետ անմիջական սահմանի բացակայության պայմաններում (Ադրբեջանի կազմի մեջ մտնող Նախիջևանի հետ ունեցած սահմանը Թուրքիային էլք չի ապահովում դեպի կասպիական էներգետիկ ռեսուրսները) կանգնել էր «միջանկյալ» Վրաստանի հետ բարեկամական հարաբերություններ հաստատելու անհրաժեշտության առջև¹:

Այդպիսով՝ Վրաստանի հետ հարաբերությունների բարելավմամբ Թուրքիան ակնկալում էր ուժեղացնել իր ազդեցությունը ողջ անդրկովկասյան տարածաշրջանում: Այդ քաղաքականությունը վերջինը հատկապես զարգացրեց արդեն վրաց-արխազական պատերազմի ավարտից հետո:

¹ Նույն տեղում:

Թուրք-վրացական ռազմաքաղաքական հարաբերությունները 1995-2001թթ.

Վերևում տեսանք, որ 1990-ականների սկզբին Վրաստանն արագ դարձավ Թուրքիայի ամենակարևոր արտաքին քաղաքական գործընկերներից մեկը հետխորհրդային տարածքում: Թուրքիայի համար Վրաստանի այդչափ մեծ կարևորությունը հիմնականում պայմանավորված էր այն իրողությամբ, որ Թուրքիան Վրաստանն սկսեց դիտարկել որպես Ադրբեջանին և Միջին Ասիային կապվելու «միջանցք», մյուս կողմից՝ Բաքու-Ջեյհան նախագծվող նավթամուղը՝ Վրաստանի տարածքով անցկացնելու ձգտմամբ: Ուստի, 1990-ականների երկրորդ կեսից, գրեթե չթաքցնելով իր ռազմավարական պայմանավորվածություններն Ադրբեջանի հետ՝ Անկարան ակտիվ ջանքեր էր գործադրում նաև Վրաստանին իր ռազմավարական ուղեծրի մեջ ընդգրկելու ուղղությամբ: Թուրքիան հատկապես ձգտում էր ընդլայնել համագործակցությունը Վրաստանի հետ՝ խաղարկելով ՆԱՏՕ-ին անդամագրվելու վերջինիս նկրտումներին աջակցելու խաղաքարտը:

Արևմուտքի հետ սերտ հարաբերությունների հաստատման ուղղությամբ Վրաստանն ակտիվ քայլեր ձեռնարկեց 1995թ. Վրաստանի նախագահ Էդ.Շևարդնաձեի դեմ կազմակերպված մահափորձից հետո [21, p. 7]:

Այս իրադրությունն ավելի քան համապատասխանում էր Թուրքիայի քաղաքական նպատակներին: Արագ տեղաշարժեր սկսվեցին թուրք-վրացական հարաբերություններում: Մասնավորապես, 1996թ. մարտի սկզբին Թուրքիայի Ազգային մեծ ժողովի նախագահ Մ.Քալեմլին ժամանեց Վրաստան: Նա Վրաստանի նախագահ Էդ.Շևարդնաձեի հետ հանդիպման ժամանակ արժևորեց Վրաստանում ընթացող քաղաքական գործընթացները՝ համոզմունք հայտնելով, որ ժողովրդավարական ուղով ընթացող Վրաստանը կդառնա խաղաղության և կայունության երաշխիքը տարածաշրջանում: Նա գոհունա-

կություն հայտնեց նաև այն փաստի առիթով, որ Վրաստանի առևտրային հաշվեկշռի մեջ այդ պահին Թուրքիան գրավում էր առաջին տեղը: Անդրադառնալով երկկողմ հարաբերությունների զարգացման հեռանկարներին՝ Մ.Քալեմլին ընդգծեց, որ Թուրքիան վրաց-թուրքական փոխհարաբերությունները դիտում է որպես երկու իրավահավասար, բարեկամական երկրների հարաբերություններ [21, p. 8]:

Թուրք-վրացական հարաբերություններն ամրապնդելու նպատակով 1996թ. ապրիլին պաշտոնական այցով Թուրքիա մեկնեց Վրաստանի նախագահ Էդ.Շևարդնաձեի գլխավորած պատվիրակությունը: Մ.Դեմիրելը Վրաստանի նախագահի հետ հանդիպման ժամանակ շեշտեց, որ նրա այցն Անկարա նպաստելու է երկու երկրների միջև արդեն իսկ գոյություն ունեցող և հետագա կապերի զարգացմանը, և որ թուրք-վրացական սերտ համագործակցությունը բխում է երկու պետությունների շահերից¹: Վրաստանի նախագահը գոհունակություն է հայտնել երկու երկրների միջև հարաբերությունների զարգացման տեմպերից՝ արժևորելով տարածաշրջանում խաղաղության և կայունության հաստատման գործընթացում Թուրքիայի դերակատարությունը: Նա, շնորհակալություն հայտնելով Թուրքիային Վրաստանի տարածքային ամբողջականությանը ցուցաբերվող աջակցության համար, ընդգծեց, որ հնարավոր չէ Կովկասում խաղաղությունը և կայունությունը վերականգնել առանց Թուրքիայի աջակցության²: Նա հավելեց, որ աբխազական և հարավօսական հիմնախնդիրներում Թուրքիայի պաշտոնական դիրքորոշումը՝ հոգուտ Վրաստանի տարածքային ամբողջականության, նպաստել է ռազմաքաղաքական և տնտեսական ոլորտներում թուրք-վրացական հարաբերությունների զարգացմանը՝ Թուրքիան վերածելով «Վրաստանի երկարաժամկետ ռազմավարական գործընկերոջ»³:

¹ Turkish Daily News, 04.04.1996.

² Նույն տեղում:

³ *Mustafa Aydın*, Turkish Policy Toward the Caucasus, www.ciaonet.org/olj/co/co_jul02/co_jul02f.pdf.

Վերոհիշյալը ցույց է տալիս, որ Թուրքիան լավագույնս օգտագործեց տարածաշրջանի հակամարտությունները և ոչ միայն Ադրբեջանից հետո «մուտք գործեց» նաև Վրաստան, այլև սկսեց «ընկալվել» որպես տարածաշրջանային լուրջ դերակատար:

Թուրք-վրացական հարաբերությունների զարգացումը հետագա տարիներին անընդհատ ամրագրվում էր նորանոր միջպետական պայմանագրերի կնքմամբ: 1998թ. մարտի 13-ին Վրաստան Թուրքիայի վարչապետ Մ.Յըլմազի պաշտոնական այցի ժամանակ ստորագրվեցին համաձայնագրեր առևտրատնտեսական հարաբերությունների զարգացման վերաբերյալ: Քննարկվեցին կասպիական էներգետիկ ռեսուրսների արտահանման Բաքու-Ջեյհան ուղեգծի հետ կապված մի շարք հարցեր [19, էջ 106]: Վրաստանի նախագահ Էդ.Շևարդնաձեի հետ հանդիպումից հետո Թուրքիայի վարչապետը լրագրողներին հայտնեց, որ թուրք-վրացական հարաբերություններում խնդիրներ կամ տարածայնություններ գոյություն չունեն, Վրաստանը որակեց որպես երկիր, որի հետ Թուրքիան ուներ «համատեղ շահեր, և որի հետ Թուրքիան ձգտում էր ամրապնդել համագործակցությունը բոլոր բնագավառներում» [19, էջ 106]: Իր հերթին, Էդ.Շևարդնաձեն Մ.Յըլմազի այցելությունը որակեց բեկումնային և նշեց, որ Թուրքիան միշտ էլ դժվարին օրերին եղել է Վրաստանի կողքին: Ծանր օրերին, երբ Վրաստանը վտանգի մեջ էր, չնայած Թուրքիայում առկա արխագամետ լոբբիի ճնշմանը, Թուրքիան վարկեր և մարդասիրական օգնություն է տրամադրել Վրաստանին, ինչպես նաև պաշտոնապես սատարել նրա տարածքային ամբողջականությանը¹:

Պետք է նշել, որ թուրք-վրացական համագործակցությունը զարգանում էր նաև ռազմական ոլորտում: 1998-ից Թուրքիան սկսեց աջակցել Վրաստանին ռազմական կրթության և բանակի կազմավորման գործընթացում²:

¹ *Manos Karagiannis*, The Turkish-Georgian Relationship and the Transportation of Azerbaijani Oil, <http://ourworld.compuserve.com/HOME/PAGES/USAZERB/413.htm>:

² Նույն տեղում:

Ռազմական ոլորտում թուրք-վրացական համագործակցության զարգացմանը նպաստեց 1998թ. ապրիլի 15-ին Վրաստանի պաշտպանության նախարարության և Թուրքիայի Գլխավոր շտաբի միջև կնքված Ռազմական ոլորտում համագործակցության համաձայնագիրը: Համաձայնագրում ընդգծված էր Թուրքիայի և Վրաստանի միջև ռազմական համագործակցության «ռազմավարական» մասը: Թուրքիան պետք է աջակցեր վրացական զինված ուժերի նյութատեխնիկական բազայի ձևավորման և կադրերի պատրաստման գործընթացին: Բացի այդ, այն պատասխանատվություն ստանձնեց ֆինանսավորելու վրացական բանակի նորացումը և կառուցելու որոշ ռազմական կառույցներ Վրաստանում [22, c. 355]:

Թուրք-վրացական ռազմական համագործակցությունն ընդլայնելու և ձեռք բերված պայմանավորվածություններն իրականացնելու նպատակով 1999թ. մարտի 1-ին Վրաստան ժամանեց թուրքական ռազմական պատվիրակությունը՝ Թուրքիայի հատուկ նշանակության զորքերի հրամանատար Է.Ալանի գլխավորությամբ: Վրաստանի ռազմական ղեկավարության հետ հանդիպումներից հետո ստորագրվեց թուրք-վրացական ռազմական համագործակցության համաձայնագիրը, որի շրջանակներում Թուրքիան Վրաստանին պետք է հատկացներ \$5.5 մլն՝ ռազմական օբյեկտների վերակառուցման և վերազինման, վրացական ռազմական ակադեմիայի կրթական կենտրոնի կառուցման և վրացական բանակի ֆինանսավորման համար: Թուրքիան պարտավորվեց նաև ֆինանսավորել Գորիի ռազմավորադաշտի վերակառուցման աշխատանքները, ինչպես նաև վրացական նավատորմի համար գնել նավիզացիոն սարքավորումներ [23, c. 74]:

1998թ. մայիսին Վրաստանի և Թուրքիայի միջև անցկացվեցին համատեղ «Կովկասյան Ամազոնիա-98» զորավարությունները՝ սևծովյան Փոթի և Բաթումի նավահանգիստների ավազանի շուրջ ձեռք բերված համաձայնագրի շրջանակներում, որից հետո՝ մինչև 1999թ.,

Թուրքիան վրացական զինված ուժերին և սահմանապահներին տրամադրեց մոտ \$10 մլն [22, cc. 355-356]:

Ռազմական ոլորտում թուրք-վրացական հարաբերությունների ակտիվացման և համագործակցության հետագա զարգացման նպատակով կողմերը 1999թ. մարտին ստորագրեցին ռազմական աջակցության և համագործակցության պայմանագիրը, որի շրջանակներում Թուրքիայի կողմից ցուցաբերվելիք ռազմական աջակցությունը ծառայելու էր Վրաստանի անկախության ամրապնդմանը, ինչպես նաև Արևմուտքի և, մասնավորապես, ՆԱՏՕ-ի հետ Վրաստանի հարաբերությունների զարգացմանը [19, էջ 108]:

2000թ. հունվարի 14-15-ին տեղի ունեցավ Թուրքիայի նախագահ Ս.Դեմիրելի պաշտոնական այցը Վրաստան: Վերջինիս նախագահի հետ հանդիպման ժամանակ Ս.Դեմիրելին առաջարկեց ստեղծել Կովկասյան կայունության պակտ: Նա համեմատել է Բալկաններն ու Կովկասը և նշել, որ ԵԱՀԿ-ն և ԱՄՆ-ը պետք է ներգրավվեն այդ ծրագրի մեջ: Ս.Դեմիրելի խոսքերով՝ «տարածաշրջանի կայունությանն ուղղված պակտի ստեղծման ծրագիրը ԵԱՀԿ անդամ բոլոր երկրների խնդիրն է»¹:

Ակնարկելով Ռուսաստանին՝ Ս.Դեմիրելը նաև ասել է, որ ոչ մի պետություն չպետք է ձգտի իր գերիշխանությունը հաստատել նորաստեղծ երկրների վրա, այլ պետք է աջակցի նրանց՝ զարգացնելու տնտեսությունը և ժողովրդավարությունը, որպեսզի վերջիններս ի վիճակի լինեն կանգնել սեփական ոտքերի վրա²:

Այցի ընթացքում կողմերը հանգեցին նաև այլ համաձայնությունների: Նրանք պայմանավորվեցին բացել ցամաքային երրորդ՝ Զըլդըր-Աքթաշ անցակետը: Թուրքական կողմը նաև պատրաստա-

¹ Turkish Daily News 17.01.2000: Դեմիրելը մասնավորապես նշել էր. «Առանց բաժանման գծերի, ժողովրդավարական և բարգավաճող Եվրոպայի համար Կովկասի կայունությունն առանցքային է: Մեր գլխավոր նպատակն է ճնշում գործադրել քաղաքակիրթ երկրների վրա, որպեսզի վերջիններս ավելի մեծ ուշադրություն դարձնեն Կովկասյան տարածաշրջանին»:

² Turkish Daily News, 17.01.2000.

կամություն հայտնեց ստանձնելու Վրաստանի ռազմական օդաչուներին մարզելու գործը¹:

2001թ. հունվարի 28-ին Թուրքիայի պաշտպանության նախարարը, օդային ուժերի հրամանատարի և այլ զեներալների հետ միասին, մասնակցեց Թուրքիայի աջակցությամբ երեք ամսում արդիականացված Մառնեուլի ռազմաօդային բազայի բացման արարողությանը: Նախատեսվում էր, որ այդ բազայում աշխատելու էին նաև թուրք զինվորականներ: Թուրքիայի պաշտոնական շրջանակները համարում էին, որ բազան ռազմավարական երկկողմանի կարևորություն էր ներկայացնում²: Երկու պետություններն ընդունեցին համատեղ հայտարարություն՝ շեշտելով, որ կողմերը շարունակելու էին ջանքերը տարածաշրջանում կայունության և անվտանգության մեխանիզմներ մշակելու և ներդնելու, մասնավորապես՝ Կովկասյան կայունության պակտ ստեղծելու ուղղությամբ³:

2001թ. հունվարին Էդ.Շևարդնաձեն դարձյալ ժամանեց Թուրքիա: Այցի ժամանակ ստորագրվեցին համաձայնագրեր ռազմարդյունաբերության և սահմանում ականների վերացման ոլորտներում համագործակցության մասին: Ռազմարդյունաբերության ոլորտում գործակցությունը ներառելու էր համապատասխան կրթության, տեխնիկական աջակցության և այլ հարցեր, որի նպատակը Վրաստանի բանակը ՆԱՏՕ չափանիշներին համապատասխանեցնելն էր⁴:

Թուրքիայի նախագահ Ա.Սեզերը դարձյալ խոսեց այն մասին, որ Թուրքիան ճանաչում և սատարում է բարեկամ և ռազմավարական գործընկեր Վրաստանի անկախությանը և տարածքային ամբողջականությանը: «Թուրքիան ամեն գնով աջակցելու է Վրաստանի ջանքերին՝ ուղղված քաղաքական կայունության բարելավմանը»⁵:

¹ Türkiye, 17.01.2000.

² Milliyet, 30.01.2001.

³ Radikal, 30.01.2001.

⁴ Cumhuriyet, 30.01.2001.

⁵ Նույն տեղում:

2001թ. հուլիսի 3-ին պաշտոնական այցով Թբիլիսի ժամանեց Թուրքիայի պաշտպանության նախարար Ս.Չաքմաքոլուն: Այցի ժամանակ քննարկվեցին ռազմական բնագավառի համագործակցության և, մասնավորապես, Վրաստանի տարածքից ռուսական ռազմակայանների դուրսբերման ժամկետների ուշացման վերաբերյալ խնդիրները: Վերջինի կապակցությամբ Ս.Չաքմաքոլուն հայտնեց, որ Թուրքիան ամբողջովին աջակցում է Վրաստանին ռուսական զորքերի դուրսբերման հարցում: Էդ.Շևարդնաձեի հետ հանդիպման ժամանակ Ս.Չաքմաքոլուն նշեց, որ նախորդ տարիների ընթացքում Թուրքիան դարձել էր Վրաստանի հիմնական գործընկերը ոչ միայն առևտրի, այլ նաև ռազմական ոլորտում: Թուրքիան արդեն ավելի քան \$12 մլն է տրամադրել Վրաստանի ռազմական ոլորտի զարգացման համար: «Ակնհայտ է, որ Թուրքիան և Վրաստանը դարձել են լավ գործընկերներ, հատկապես ռազմական ոլորտում»¹:

2001թ. սեպտեմբերի 11-ի ահաբեկչությունից հետո Թուրքիան ակտիվացրեց համագործակցությունը Վրաստանի հետ: Շեշտադրումն սկսեց կատարվել անվտանգության և ահաբեկչության դեմ պայքարի վրա: 2001թ. նոյեմբերի 7-8-ը Թուրքիայի նախագահ Ա.Սեզերը ժամանեց Վրաստան: Էդ.Շևարդնաձեի հետ հանդիպման ժամանակ նրանք պայմանավորվածություն ձեռք բերեցին՝ ստորագրել համաձայնագիր ահաբեկչության դեմ պայքարում համագործակցելու վերաբերյալ: Լրագրողների հետ հանդիպմանը Ա.Սեզերը հայտարարեց, որ քննարկման ժամանակ ինքը Վրաստանի նախագահին առաջարկել է համաձայնագիրը դարձնել եռակողմ՝ թուրք-վրաց-ադրբեջանական²:

Ըստ թուրքական լրատվամիջոցների՝ Շևարդնաձեի հետ հանդիպումից հետո Թուրքիայի նախագահը հեռախոսազրույց էր ունեցել

¹ Коммерсант, 04.07.2001.

² Caspian news agency, 09.11.2001.

Ադրբեջանի նախագահ Հ.Ալիևի հետ՝ նրան նույնպես առաջարկելով Թուրքիայի, Վրաստանի և Ադրբեջանի միջև կնքել անվտանգության հարցերին վերաբերող պայմանագիր¹:

Ամփոփելով թուրք-վրացական ռազմաքաղաքական հարաբերությունների վերլուծությունը՝ կարող ենք նշել.

1. ԽՍՀՄ փլուզումից հետո Թուրքիան կարողացավ արագ մշակել սեփական առաջնահերթություններն Անդրկովկասյան տարածաշրջանում, որտեղ նրա գործունեության համար ստեղծվել էին նպաստավոր պայմաններ:
2. Վրաց-աբխազական հակամարտության ընթացքում Թուրքիան, ելնելով իր ռազմավարական շահերից, խուսանավում էր վրացական և աբխազական կողմերի միջև՝ ջանալով օգտագործել հակամարտությունը Վրաստանում իր դիրքերի ամրապնդման համար: Մի կողմից՝ Թուրքիան պաշտոնապես հանդես էր գալիս Վրաստանի տարածքային ամբողջականության օգտին, մյուս կողմից՝ չէր խոչընդոտում Թուրքիայի հասարակական շրջանակներին և չէր քեզական սփյուռքին ակտիվ օգնություն ցուցաբերել Աբխազիային: Աբխազական հիմնահարցում Թուրքիայի ոչ հստակ դիրքորոշումն սկզբում բացասական ազդեցություն թողեց թուրք-վրացական հարաբերությունների վրա:
3. Հանդես գալով որպես Վրաստանի տարածքային ամբողջականությունը ճանաչող և սատարող պետություն՝ Թուրքիան այդուհետ աստիճանաբար վերածվեց Վրաստանի ռազմավարական գործընկերոջ:
4. Թուրքիային հաջողվեց Վրաստանի առումով հանդես գալ որպես Ռուսաստանին ոչ միայն հակակշռող, այլ նաև ազդեցության առումով փոխարինող ուժի դերում՝ աստիճանաբար ամրապնդելով այն տեսակետը, թե ԽՍՀՄ փլուզումից հետո Թուր-

¹ Turkish Daily News, 17.11.2001.

քիայի միջոցով Վրաստանը կարողացել է հաղթահարել տնտեսության փլուզման փուլը և ստեղծել բանակ:

5. Թուրքիան կարողացավ լուծել նաև ադրբեջանական և միջին-ասիական էներգետիկ ռեսուրսների արտահանման Թուրքիա-Ադրբեջան միջանցքի ստեղծման հարցը, որի միջանկյալ կարևոր օղակն էր Վրաստանը:
6. Վրաստանն իր անկախության առաջին 10 տարիների ընթացքում Թուրքիայի հետ կնքեց բազմաթիվ պայմանագրեր, որոնք ընդգրկում էին միջպետական հարաբերությունների բոլոր բնագավառները:
7. 1990-ականների սկզբին Վրաստանի նկատմամբ Թուրքիայի զգուշավոր քաղաքականությունը 90-ականների երկրորդ կեսից թևակոխեց լայն համագործակցության փուլ, ինչին նպաստեց տարածաշրջանում ՌԴ դիրքերի ամրապնդմամբ պայմանավորված Վրաստանի մտահոգությունը:
8. Թուրք-վրացական հարաբերությունների ամրապնդման նպաստավոր գործոնների թվում էին նաև Թուրքիայի՝ ՆԱՏՕ անդամ լինելը և 2001թ. սեպտեմբերի 11-ի ահաբեկչական իրադարձությունների արդյունքում ԱՄՆ ակտիվ ներգրավվածությունը տարածաշրջանում:

Փետրվար, 2013թ.

Աղբյուրներ և գրականություն

1. *Գրիգոր Արշակյան, Արման Եղիազարյան*, Թուրք-ադրբեջանական ռազմաքաղաքական հարաբերությունները 1991-2001թթ., «21-րդ դար», թիվ 5 (45), 2012թ.:
2. *Գրիգոր Արշակյան, Արման Եղիազարյան*, Թուրքիայի քաղաքականությունը Անդրկովկասում և թուրք-ադրբեջանական հարաբերությունները 2002-2008թթ., «21-րդ դար», թիվ 6 (46), 2012թ.:
3. *Ali Karaosmanoğlu*, Turkey Objectives in the Caspian Region, The Security of the Caspian Region,- Oxford: University Press, 2001.

4. *Mustafa Aydın*, Ethnic Conflict and Security in Central Asia and Caucasus: The Role of Turkey.- Marco Polo Magazine, Vol. 3, 1998.
5. *Mustafa Aydın*, Turkish Foreign Policy: Framework and Analysis, Ankara, Stratejik Araştırmalar Merkezi, 2005.
6. *Roman Szporluk*, National Identity and Ethnicity in Russia and the New States of Eurasia, New York, 1994.
7. *Carolyn McGiffert Ekedahl and Melvin A. Goodman*, The Wars of Eduard Shevardnadze, Pennsylvania, 1997.
8. *Glenn E. Curtis*, Armenia, Azerbaijan, and Georgia: Country studies, Washington D.C., 1995.
9. *Achim Wennmann*, Renewed Armed Conflict in Georgia? Options For Peace Policy in a New Phase of Conflict Resolution, Program for the Study of International Organization(s), Graduate Institute of International Studies, Geneva, May 2006.
10. *Оганесян Н.*, Некоторые особенности этнорегиональной политики Армении, Этническая и региональная политика Армении и Грузии, Материалы круглого стола 16-19 апреля 1999г., Ереван, 1999.
11. Գ.Արշակյան, Ա.Եղիազարյան, Արխազիան Թուրքիայի ռազմավարական շահերի համատեքստում, «21-րդ ԴԱԸ», թիվ 6 (34), 2010:
12. *Sever Metin*, Kafdağ'ın Bu Yüzü: Türkiye'deki Kafkas Kökenliler, İstanbul, 1999, p. 183; Yedi Yıldız, Aylık Dergisi, Mayıs 1994.
13. Marje, Sönmez Baykan, Bir Ulus Olmak, Bir Vatana Sahib Olabilmek İçin Birlemek Zorundayız, October 1992.
14. *Gareth M. Winrow*, Turkey and the Caucasus: Domestic Interests and Security Concerns. London, Royal Institute of International Affairs, 2000.
15. *Коджаман О.*, Южный Кавказ в политике Турции и России в постсоветский период, Москва, 2004.
16. *Mehmet Tütüncü*, The Caucasus Policy of Turkey (1990-1997): Caucasus: War and Peace: New World Disorder in Caucasia, Haarlem: SOTA, 1998.
17. *Stuart Kaufman*, Modern Hatreds: The Symbolic Politics of Ethnic War, London, 2001, p. 122, SIPRI Rearbook 1995, Oxford, 1995.
18. Yedi Yıldız, Aylık Dergisi, Ekim 1994.
19. *Չրհզոր Արշակյան*, Թուրքիայի քաղաքականությունը Հարավային Չովկասում 1991-2001թթ., Երևան, 2009:
20. *Гюльтекин Б.*, Турция-Южный Кавказ: анализ современной ситуации, Южный Кавказ: региональная безопасность и стабильность, Материалы конференции. Под общей редакцией Гаянэ Новиковой. Редакторы А.Мельян, С.Саркисян. Перевод А.Мельян, Ереван, 2004.
21. *Gia Tarkhan-Mouravi*, The Georgian-Abkhazian Conflict in a Regional Context.- Chapter 6, Part 1, Vrije Universiteit Brussel, August 1998.

22. *Гаджиев К.С.*, Геополитика Кавказа, Москва, 2003.
23. *Авакова Р.М., Лисова А.Г.*, Россия и Закавказье: Реалии независимости и новое партнерство, ИМЭМО РАН, М., 2000.

ТУРЕЦКО-ГРУЗИНСКИЕ ОТНОШЕНИЯ В КОНТЕКСТЕ РЕГИОНАЛЬНОЙ ПОЛИТИКИ ТУРЦИИ В 1991-2001ГГ.

Григор Аршакян, Арман Егиазарян

Резюме

В период грузино-абхазского конфликта Турции удалось утвердить свои позиции в Грузии. Изначально Турция объявила, что признает территориальную целостность Грузии, но также не стала препятствовать организации помощи Абхазии со стороны абхазских и черкесских общин страны. Этим можно объяснить то обстоятельство, что в первые годы после 1991г. между двумя государствами возникли некоторые противоречия.

Но в планах Турции Грузии отводилось важное место, особенно по части постройки новых маршрутов вывоза азербайджанского нефти и газа. Таким образом, Грузия постепенно превращалась в стратегического партнера Турции.

В первые 10 лет независимости Грузии между двумя государствами было подписано множество договоров, касающихся всех областей межгосударственных отношений.